

Meeqqat atuarfianni angajullerni inuussutissarsiutitut sammiveqartut atuartsissutitut neqeroorteqarsinnaalernissamik periarfissiisinnaaneq pillugu Naalakkersuisut UKA2023 nallertinnagu nalunaarusioqqullugit aalajangiiffigisassatut siunnersuut.

(Inatsisartunut ilaasortaq Aqqalu C. Jerimiassen, Atassut)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartunut ilaasortaq Aqqalu C. Jerimiassen, Atassummeersoq, aalajangiiffigisassatut siunnersuutaanut isumatusaartumut qujassuteqarfigaara.

Naalakkersuisut siunnersuuteqartup inuiaqatigiisugut suliffeqarfinnik namminersortunik inunnillu nammineersinnaasunik pisariaqartitsineranik oqarnera isumaqatigaat.

Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfiup “Atuarfimmi atuartsissutini atuartsissutinilu qanitariissuni alloriarfiit siunertaat kiisalu atuartsissutit siunertaat ilikkagassatullu anguniagassat pillugit Namminersorerullutik Oqartussat nalunaarutaat nr. 16, 24. juuni 2003-meersoq” nutarterlugu aallaartippaat, taassumalu atuartut siunissami ilinniagassaminnik inuussutissarsiutissaminnillu toqqaasinnaanerit imarereerpaa. Taamatuttaaq ilinniagassat inuussutissarsiutillu pillugit ilisimatitsisarneq atuartsissummi “Inuttut Inerikkiartornermi” ilikkagassatut anguniagassani ilaavoq. Atuartsissut “Sumiiffinni qinigassat” aamma inuussutissarsiutit pillugit sammisaqartitsiviusarpoq, tak. § 10, Atuarfik pillugu Inatsisartut inatsisaanni nr. 15, 3. december 2012-imiittoq. Taakkua saniatigut atuarfiit aamma atuartsissutit najukkaminni pissutsinut atuartullu soqutigisaannut pisariaqartitaannullu tulluarsassallugit kiffaangissuseqarput.

Inatsisartut 2016-imi upernaakkut ataatsimiinneranni UPA2016/46-mut tunngatillugu Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap allanguutissatut siunnersuutaasa ilaat akuersissutigineqarpoq. Akuersissummi tassani pineqarpoq Naalakkersuisut pisussaaffilerneqassasut atuarfimmi akulliit alloriarfiini aamma/imaluunniit angajulliit alloriarfiini immikkut ittumik ilitsersuineramik suliniummik aallartitaqassasut siunertaralugu atuartut ilinniagaqalerfissat assigiinngitsut sumullu atorneqarsinnaaneri pillugit annertunerusumik ilisimasaqalernissaasa anguniarnissaa. Allanguutissamik siunnersuutip ilagaa, suliniut 2017-imi aallartinneqassasooq aningaasaliisoqassasorlu kommunit paasisassarsiorlutik angalatitsinissaminnut, suliffinnut pulaarnissaminnut aammalu suliffeqarneq pillugu immikkut atuartsisoqarniartillugu qinnuteqarfigisinnaasaannik. Suliniut aallartinneqareerpoq, Ilinniartitaanermullu Aqutsisoqarfimmit aqutarineqarluni.

Ilinniartitaanermut Aqutsisoqarfimmut paasisassarsiorluni angalanernut aningaasaliissutit saniatigut suliniutit arlaqartut maannakkut ingerlanneqareerput. Suliniutini taakkunani siunertaavoq meeqqat inuusuttullu meeqqat atuarfianni atuartut ilinniagaqalernissaminnik toqqammavissaqarluarlutik toqqaasinnaanissaannut kajumissuseqalersitsinissaq. Suliniutit taakkua Fonden for Entreprenørskab-imit, CSR Greenland/GE-mit aammalu Mind Your Own Business-imit ilaatigut ingerlanneqarput.

Fonden for Entreprenørskab atuartitsisut ilinniagaqaqqinnissaannik neqeroorfigisarpai. Suliniummi tassani Naalakkersuisut aamma Fonden for Entreprenørskab suleqatigiillutik meeqqat inuusuttullu nutaaliarluni aallartitsiniarnerit, nutaaliorniarnertit aallarniiniarnerillu iluini piginnaasaqarfiisa siuarsarnissaat ingerlattarpaat. Iisimatusarnerup takutippaa nutaaliarluni aallartitsiniarnernik atuartitsinerit meeqqat inuusuttullu akornanni aallarniiniarnernik kajumissuseqarneq annertusaaqataaffigisaraat, tamatumunngalu peqatigitillugu atuarnertik nuannarinerulertarpaat. Taamatutaaq Fonden for Entreprenørskab nukarliit alloriarfiiniit angajulliit alloriarfiinut atuartitsissutissanik akeqanngitsumik neqerooruteqartarpoq, nutaaliorniarnernik nutaanillu aallartitsiniarnernik imaqartunik.

CSR Greenlandip QAQISA ineriartortinnikuuaa. Tassani atuarfiit inuussutissarsiorfiillu suleqatigiipput meeqqat atuarfianni atuartut angajulliit tunngavissaqarluarlutik ilinniagaqalernissaminnik toqqaanissaannut kajumissaartarlugit. Suliffeqarfiit QAQISA aqqutigalugu inuusuttut, suliffeqarfinni suleqataalersussat, kajumissaartarpaat, ikiortarpaat ilitsersortarlugillu.

Nummi Mind Your Own Businessip nukappiaqqat 13-init 21-inut ukiullit isumassarsiaminnik suliffeqarfinni mikisumi pilersitaminnik ineriartortitsinissaannut, tunisassiornissaannut isumassarsiaminnillu tuniniaanissaannut neqeroorfigisarpai. Sulineq tamanna inuiaqatigiinni venturepilotit, suliffeqarfinni immikkut ilisimasallit aammalu kommuni najukkamilu suleqatit peqatigalugit ingerlanneqartarpoq.

Kommunit taamaalillutik meeqqat atuarfianni atuartitsissutit namminneq anguniakkaminnut naapertuuttunngorlugit tulluurtunngorlugillu aaqqissuussinissaminnut periarfissaqareerput, tassunga ilanngullugit suliniutit suliffeqarfinnut sammitinneqartut annertusarsinnaavaat aammalu ilinniagaqalernissamik inuussutissarsiuteqalernissamillu ilitsersuinitik annertusarsinnaallugit. Periarfissat taakkua suliniutinik pitsaasunik amerlasuunik Naalakkersuisut matumani taasaannik ilaqartinneqarput. Taaneqartut pissutigalugit Naalakkersuisut isumaqarput angajulliit alloriarfianni inuussutissarsiutit pillugit atuartitsissutit nalunaarusiorneqarnissaat piffissami matumani pisariaqanngitsoq.

Taakkua saniatigut marsi 2022-mi Naalakkersuisut Ilinniartitaaneq pillugu isumasioqatigiisitsipput. Tassani Naalakkersuisut ilinniartitaanerup tamarmiusup aaqqiissusaanerata ataqatigiinnerulernissaa aaliangiinermi tunngavittut atorpaat. Aalajangiussat Naalakkersuisut ilinniartitaanerit periusissiaanni tulliuttumi ilanngunneqassapput.

Siunnersuut isumatusaartuugaluortoq qulaani taakkartorneqartut aallaavigalugit Naalakkersuisut siunnersuut itigartitsissutigineqassasoq inassutigaat.